



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10

Yangia anidakangma :

Tir Yimyim

tiryimyim@aolima

tir yimyim

TAPAK 7

World Ranking Series nung Bajrang Punia-i Gold angu

Kobi melii Modi-i linük nungja-a pa tenüng agi melentsü: Mamata



VOL. XVIII NO. 144 (ADOK 144) DIMAPUR

SANGTENNÜ (TUESDAY)

METSÜREMI (MARCH) 09, 2021

₹ 5.00

PM Modi-i Axomiya Gamosa aser Aor sü ka ali

Guwahati, March 8 (Agencies): Assam Assembly election agitsü anogo 20 shi ka dang lia Hombarnü PM Narendra Modi-i Rs 1,950 agi Axomiya Gamosa ka aliogo.

Narendra Modi-i Kakatipapung Development Block nung self-help groups-i yangluba Gamosa ji online ajanga ali.

"Nenoki ni mapang shia Gamusa enokba nguogo. Iba ajanga meinprong kecha mali. Tanü ni Kakatipapung Development Block nung self-help groups balalai yangluba Gamusa ka aliogo" ta Modi-i Twitter nung metetdaksü.

PM Modi-isa Naga nunger sü- Aor sü tabentsü ka ali.

"India-i Naga nunger sobaliba

atema nüma atanger. Parnok sobaliba ya tasü aitba, aria bilemba aser purapitetba den sendaktepa lir. Nagaland nungi sobaliba sü ka aliogo" ta paisa metetdaksü.

Narendra Modi-i tetsürtem tsüngda entrepreneurship ajungmesotsü atema International Women's Day tenüng nung gamosa aser Aor süji ali.

"India-i Aatmanirbhar akümtsü atema inyakba nung tetsürtemi tongtipang shilem agidar. International Women's Day nung asenoki tetsürtem tsüngda entrepreneurship ajungmesodi. Tanü ni tetsürtemi yanglutetba aser India'er sobaliba ajungketba products kar aliogo" ta Modi-isa ashi.

Tsüngremi PDA sorkar len ania aruogo: NDPP

Dimapur, March 8 (TYO): Tsüngremi Nagaland nung Peoples Democratic Alliance (PDA) sorkar küm asem tashi len anir aruba atema tenüngsang agütsür ta Nationalist Democratic Progressive Party (NDPP)-i metetdaksüogo.

Kin Hoho tem, Civil Society teloktem, NGOs aser Nagaland sensotemi pusema nungitba ajanga dang tesüiba küm asem tashi sorkar ketdangsüa arutetogo aser iba atema kanga pelar, ta NDPP Media & Communication Committee sangdong ka nung ashi.

"NDPP-isa onok den yaritepba teloktem, BJP aser Independent dang kangasa pelaba metetdaksür. Nenok teyaritep ajanga dang PDA sorkar indang alizüngtem aser tenangzükbatem inyakteter. Iba tesentaktep ya maneni tashitaitba küma asenoki

nübertem atema mapa inyaktsütsü amanger" ta parnokisa ashi.

Chief Minister Neiphiu Rio lenisüba kübok PDA sorkar nem tenüngsang agütsütsü tim kechiyong COVID-19 wara agi timtemba mapang parnoki state kanga junga len aniogo ta NDPP-isa metetdaksü.

PDA sorkari wara aliba ajanga benjungbentsü kecha mamongba atema pelar, ta parnokisa ashi.

NDPP-i akokba tashi PDA sorkar pusema nungittsü aser PDA indang alizüngtem aser tenangzükbatem iba kümsük adena aitsü imlar. NDPP-isa "ajak atema terenlok, ajak den külemi" ta asüba yimyim nung ajemdaker nübertem nem terenlok bentsür arutsü nangzükbata ama inyaktsü akangshir, ta NDPP Media & Communication Committee sangdong nungsa metetdaksüogo.

Assam election flying squad-i Naga nunger 3 ket nungi sen aika apu

Guwahati, March 8 (Agencies): Assam assembly election atema flying squad kati Assam-Nagaland arrtsü anasa Nagaland nungi nisung asem ket nug sen aika bena lia puogo.

Jorhat district kübok Mariani nung police-i New Sonowal gate nung garitem mita repringdang Bolero gari ka nung senji bena lia angu. Iba sülen ketdangsürtem nem osang sangoktsü aser par asem police station-i anir ao, ta ketdangsürtemi ashi.

Nisung asemji Eastern Nagaland kübok Tuensang district nungi lir aser parnoki Mokochung district ajanga Assam-i aru.

Par asem dang asüngdangya

asü dang Assam nung gari ka alitsü atema senji bener aru ta ashi. Parnok Mariani nung gari ka alitsü atema aodang apu ta parnokisa metetdaksü.

"Par asem ket nungi Rs. 8.5 lakh ngutetogo. Parnok gari ka alitsü atema aru aser senji pua lir. Parnoki kulikatetem aser gari alitsü dak sendakba kulitem agütsütsüla. Iba maparenji tembangba sülen senji meyipa agütsütsü" ta ketdangsür kati osangbener dang ashi.

Par asemprong ya Nagaland state sorkar mapa inyakertem lir ta osang angazüker.

Assam nung March 27, 2021 nungi tenzüker shilem asem lemsar assembly election agitsü sentong lir.

Nagaland nung International Women's Day ayonga among



March 8, 2021 nü Hotel Vivor, Kohima nung International Women's Day 2021 amongdang NSCW Award 2021 angurtemi Nagaland Chief Secretary J Alam IAS, DGP John Longkumer IPS aser sorkar tongti ketdangsürtem den külemi agiba noksa angur. (Kohima, March 8)

Dimapur, March 8 (TYO): Nagaland nung Hombarnü tetsürtem nem akhüm tetushi agüja International Women's Day 2021 ayonga mongogo.

Tanü Hotel Vivor, Kohima nung "Women in leadership: Achieving an equal future in a COVID-19 world" omen nung ajemdaker iba sentong agiogo.

Iba sentong ya Nagaland State Commission for Women (NSCE), Nagaland State Social Welfare Board (NSSWB) aser Social Welfare Department kübok State Resource Centre for Women (SRCW) külemi yaritepa ayongzüker.

Sentong nung Commissioner & Secretary, Social Welfare, Sarah R. Ritse-i Ministry of Women & Child Development kübok tetsürtem asoshi scheme tem aser maparen balala inyakba osang metetdaksü.

NSCW kübok 181 Women Helpline, Childline 1098, State Protection Services ajanga wara mapang tetsürtem aser tanurtem dak tashiyim mapa inyakba ken o tem atema inyakogo ta Sarah R. Ritse-isa ashi.

"Nagaland nung 181 Women Helpline aser SRCW takok ngua inyakba repringdangtsü atema Tamil Nadu-i state semdangogo. Nagaland nung item mapa kanga junga inyaker aser yagi Nagatsürtemi bendanga agüja inyakba kuli sayur," ta laisa metetdaksü.

Ritse-isa item mapa nung sendaktepaa alirtemi District Administration den yaritepa takok ngua inyaktsü mepishia ashi.

Sentong nung NSCW Chairperson, Khrienuo Tachü-ia Nagatsürtem nem tenüngsang

agüja jembi.

"Tayongzükbata aser tetsükdaksü aika ajuruaka Nagatsürtemi mapa tajung aika inyakteta arur aser wadang balala nung tongtipang lenirtemi kümogo. Raino Shaiza, Neichiülieü Nikki Haralu, Dr. Khrieliü Kire, Banuo Z. Jamir, Prof. Temsula Ao aser Rev. Dr. Noksangchila nungeri anir Nagatsür aika Nagaland nung dang masü saka tangalen aliba tetsürtem asoshi role models ama züngshir," ta Khrienuo Tachü-isa metetdaksü.

"Mapang melenshia aruba ama jabaso aser jala ajak nem kaketshisatsü angazütsü atema kasa maongka agütsür saka tetsürtem dak sendakba inyakim kar agientsü aser ano tanga tetsükdaksü kar lir. Wadang balala nung tetsür lenirtem adokaka Naga loktiliba nung tetsürtemi yimtenren mapa nung lenisütsü atema bilemdangtsü nungdaker. Local aser state jenjang nung tetsürtemia telemtetba agiba maparen nung shilem agidaksütsüla" ta laisa ashi.

"State sorkari Nagaland Legislative Assembly nung Acquired Property Bill benoktsüla. Iba ya sobaliba nungi senmang indang masü saka tsüraburtemi pei nija rongsen atema telemtetba agitsü atema lir. Jabaso mali jala dang aliba kibongtem nung senmang angutsü dak sendakba tebilemstü atema NSCW-i mapa inyaknür kechiyong NSCW ya Nagaland sorkar indang ozüng amshiba tentet ka lir" ta Khrienuo-isa metetdaksü.

"Küm 30 tashi Nagaland nung inyakba arudang temelenshi tajung

aika nguogo. Nagatsürtemi wadang aika nung terenlok lir. Ajisüaka, ano teinyaktsü aika lir aser kodang lokti nung temelenshi ka ajangshidir, sobaliba aser inyakshangshi nunga kongshir" ta Nagaland Chief Secretary, J. Alam-isa ashi.

Tesüiba küm ka tsüngda Naga tsürtemi COVID-19 anema raraba nung lenisüba sempet aliba aika sayuogo. Tetsürtemi kanga dang meranga aser ola madoki mapa tajung inyakba atema tenüngsang agütsür. Tetsürtemi pei kibong yangertsü asoshi bendanga agüja aser meranga inyakba atema tanü asenoki parnok nem tenüngsang agütsütsü tim" ta paisa metetdaksü.

Iba sentong nung Chief Secretary, J. Alam-isa tetsür 5 nem Nagaland State Commission for Women Award 2021 agütsü.

Sempet angurtem: Naga Mothers' Association president Abeiu Meru; Chief Medical Officer, Kohima Dr. Vezokholu Theyo; Nagaland College Principals' Association & Principal, Japfu Christian College, Kigwema Dr. Visakhonü Hibo; Chang Baptist Church, Kohima Pastor S. Anungla, aser Officer-in-Charge, Women Cell, Police Station, Dimapur Inspector Rose Yanthan (UBI).

Tanü agiba sentong nungsa tetsürtemi Entrepreneurs, Nurse, Bus Conductor, Taxi Driver amala mapa balala inyakba indang video tatsüka sayua liasü.

Sentong nung Director General of Police, Nagaland, John Longkumer-i anir sorkar ketdangsürtem aser tetsür lenirtem aika aden.

NPF-i Myanmar sensotem pusema nungiter

Dimapur, March 8 (TYO): Myanmar nung mitkartemi sorkar atsüngdokba sülen tensa mejungi akümba atema Naga People's Front (NPF)-i tebilemstü khuret abenba metetdaksüogo.

Mitkari yimsü asüba anema lungkak aيتدang tai maketba nisung aika asüba atema sasa bilemer. NPF-i political party ka

ama democratic tangatetba nung amanger aser tashiyim agi sorkar ketdangsüba anema timi lungkak aittsü temeten lir. Anungji, nübertemi pei tebilemba metetdakja timi lungkak aitiba nung tashiyim mapa meinyaktsüla, ta Press Bureau, NPF sangdong ka nung ashi.

NPF-isa Myanmar nung aliba

Naga nunger ajak den külemi noktaker aser democracy o yimjung atema inyakba mapa pusema nungiter, ta parnokisa metetdaksüogo.

Mitkar ketdangsürtemi tangatetba tajung nung tensa süngjema kümdaksütsü aser tai maketba takütem melaludaksütsü imlar, ta NPF-isa ashi.

Tenük agi monguaka tetsürtemi tongti shilem agir: DC Dimapur



Deputy Commissioner, Dimapur indang Conference Hall nung March 8, 2021 nü International Women's Day amungba mapang tetushi tesemdanger aser DC Dimapur Rajesh Soundararajan IAS den wadang balala nung sempet angurtem külemi tangokba noksa nung angur.

Dimapur, Metsüremi/March 08 (TYO): Alima ajunga den külemi Dimapur district administration ajanga District Level Center for Women-Maha Shakti Kendra (DLCW-MSK) Dimapur aser Sakhi-One-stop Center (OSC) Dimapur den lungjemer March 8, 2021 nü "Women in Leadership: Achieving an equal future in a Covid-19 World" omen kübok International Women's Day munga liasü.

Iba anogomung nung tetushi tesemdanger ka ama jembiba mapang, Deputy Commissioner Dimapur, Rajesh Soundararajan IAS ajanga tetsürtem den anogomung salem lemsatet aser maparen balala nung tetsürtemi tongti shilem agiba indang jembiba.

Wadang mashi nung tetsürtemi tajungtiba shilem agitetba asoshi tenüngsang agüja jembiba mapang, kibong shia tenük agi monguaka tetsürtemi tongti shilem agir, ta Rajesh-i ashi.

"Aiben nüburi tenüng agi mongui shilem agiba mezüngshir saka tetsürtemi tenük agi mongui shilem agiba ajanga dang tenük agi ngua terenlok alir," ta pai ashi.

Mezüngbo tetsür nem tapet temeden agüja meliasü, saka mapang süitema aoba den

medema nüburtem tangatetba melenshir aser temeden asoshi nokdakba lokti tentet temi meranga inyakba ajanga loktiliba nung tetsürtem nem nükjidong balala tongtetsü aser kasa khuret abentsü asoshi kasa maongka agütsür. Ibai tanen makai inyakba yimya ka lir, kong temolung ajunga agi bendanga agütsütsü nungdaker, ta pai ashi.

Paisa tetsür nem akhum agütsütsü kanga tongtipang, ta ashi. Naga nung loktiliba nung tetsür aser tebur kasa aliba asoshi tenüngsang agüja jembiba mapang, nübur ajungtsü asoshi bilemba nem nüji agütsütsüla, ta Deputy Commissioner, Dimapur, Rajesh-i ajungshi.

Iba anogomung nung pai tetsür takok balala angutem nem tenüngsang agütsü aser COVID-19 den raraba nung tetsürtemi kasa khuret abenba atema pelaba lemsatet.

Iba anogomung nung wadang balala nungi tetsür kaka shimteta tetushi tesemdangeri sempet agüja liasü.

Iba mapang administration nungi ADC Dimapur, V. Lovitoly Sema; Medical nungi Deputy Chief Medical Officer, Dr. Antoly Suu; Women Police Station indang officer-in-charge Rose Yanthan; Sports nungi Akumtila Longkumer, Hasna Kumar aser Miss Kirusenuo;

Academic Excellence tsütsü Government Teacher (Science) Watimenla, Jain Girls' College Dimapur nungi Digamber; tetsür indang health & sanitation atema Geeta Kumari; Art and Culture nungi Zuchobeni Tongoe, Female Entrepreneurs category nung Lipokjungla Ozukum, Director aser Co-Founder, Ilando Services Private Limited; Civil society category nung Naga Women Hoho Dimapur nung nem sempet agütsü.

Maneni Non-governmental organization nungi Missionaries of Charity Kolkata nung affiliate süa aliba Missionaries of Charity Dimapur nem sempet agüja liasü.

Iba sentong nung Vilika T Chishi ajanga temeja ken ka aten, Women Welfare officer, DLCW-MSK Dimapur, Lanusangla Jamir ajanga taruru pela agizüka liasü aser Principal, NEISSR, Dimapur, Rev. Dr. C.P. Anto ajanga Tsüngrem temoatsü mechia sarasadema liasü.

Iba sentong ya Deputy Commissioner, Dimapur indang Conference Hall nung agi, kong District Coordinator, DLCW-MSK Dimapur, Dhonthaidi Langhasa menden liasü aser IT, Sakhi-OSC Dimapur, Tisaenla N. Jamir ajanga tepela ankep o jembiba liasü.

Dimapur nung mejangjabanisung tasü mangka ngutet

Dimapur, Metsüremi/March 08 (TYO): Khatkati tsütsü KM 261/8-9, Dimapur Railway Track nung March 07, 2021 nü mejangjaba Naga nung masü (tebur arishi küm 50-55 shi) nisung tasü mangka ngutet aser iba nisungba ya train agi tsükset süti, ta temolung melemi lir. Ozüing nung aliba ama maparen ajak tembangba sülen tasü mangka ya PM examination aser jangjatetsü asoshi District Hospital Dimapur nung bener oa lir. Iba nisungba ya half pant sentsü tanak, t-shirt aut sentsü semer liasü.

Iba dak sendakba nung

kibur/kinunger/tembartemi Officer-in-Charge, GRPS, Dimapur den tongteprateptsü akok.

Maneni Budu Deori ta sür arishi küm 31 tain tebur ka pasasa arua District Hospital Dimapur nung March 01, 2021 nü admit süa liasü aser temang anepaluba mapang March 8, 2021 nü asü. Ozüing agi melaba ama maparen ajunga tembangba sülen tasü mangka ya District Hospital Dimapur Morgue nung yua lir.

Asür indang kibur/kinunger/tembartemi Officer-in-Charge, East Police Station, Dimapur den tongteprateptsü akok.

Raj Bhavan Kohima nung ADC den tepila sentong agi



Dimapur, Metsüremi/March 08 (TYO): ADC to Governor, Ado Yanlem den tepila sentong ka Dr. Imkongliba Ao Hall, Raj Bhavan Kohima nung March 08, 2021 nü agia liasü. Pa Governor indang office nung küm ka ser ita ana tenzüka liasü.

Mapa yutsür aor Ado Yanlem nem tenüngsang agüja jembiba mapang Governor RN Ravi-i ashiba agi, Ado-i Raj Bhavan nung alir ajunga indang temeim aazükogo aser ozü kibong kung züingsem ka ama kümogo.

Ado-i molungsentsü tajung nung mapa shidak inyakba atema Governor-i tenüngsang agütsü aser pa nem mapa nungloksüba sülen tanaben lephshia ashitsü menüngdak, kechiaser pai teti mapa tajungtiba

nung inyak, ta ashi. Ado dak lanur molung ajungmesotsü sempet keta lir, shibai ajemalua nungloksüba mapa inyaktet, ta Governor-i nenshia ashi.

Ado-ia Governor, pa kinungtsü aser kibong aser Raj Bhavan nung staff temi molung lemtetba asoshi pelaba lemsatet.

Tashi tait aser terenlok aliba Governor ana tashi tenzüka ya tayongzüka ka liasü aser iba mapang angazükbatem arishi tepiyong amshitsü, ta pai ashi.

Iba sentong nung Commissioner & Secretary to Governor, Mhabemo Yanthan, IAS aser Dy SP Special Branch, Philip Yanthan nung temia jembiba liasü.

Mokokchung nung International Women's Day mungogo



Deputy Commissioner, Mokokchung, Limawapang Jamir aser Superintendent of Police Mokokchung, Vishal, IPS nati International Women's Day anogomung mapang Town Hall nung Bikers (Royal Enfield Club, Mokokchung) rally ka tenzüksüba noksa nung angur.

Dimapur, Metsüremi/March 08 (TYO): International Women's Day nungtem nung Mokokchung District Administration aser Sakhi One Stop Centre Mokokchung lungjemer March 8, 2021 nü

Ongpangkong Salang nung sentong ka "Women in Leadership: Achieving an equal future in COVID-19 world" omen nung ajemdaker agia liasü.

Iba sentong nung jembiba mapang, Superintendent of

Police Mokokchung, Vishal, IPS ajanga ashiba agi, tetsür nungi ajungmesoba aser tasü aitba ankur, ta ashi.

Takum nung tetsüri shilem agiba reprangdangra, iba anogo kisüing masü saka anogoshi tetsür atema asütsüla, ta pai ashi. Tanü tashi tetsür nem parnok dak langa aliba temeden magütsür, anungji sentong nung adener ajunga women empowerment atema ambassador kaka asütsüla, ta ashi.

Naga nung loktiliba nung tetsür nem temeden aika agütsür saka tanü-asüing kilung nung azüdokshi tali akumer, anungji tetsürtemi teimla mesamai ketdangsur nem osang agütsütsüla, ta Mokokchung SP ajanga ashi.

Tetsürtem kumzüka ayuba nung yaritsü atema ni aser Mokokchung Police teti renema

lir, ta pai ashi.

Sentong nung SDO (C), Mokokchung, Dharam Raj-i ashiba agi, tetsürtem nem temeden agütsüba tsütsü Nagaland ya tajungtiba lir, saka loktiliba nung tongti shilem agiba tsütsü kanga ajema lir.

Iba ama bensaa amshiba madak takok angutsü asoshi tetsürtemi pei sempet angatetsüla, anungjidang loktiliba nung tongti shilem agitetsü, ta pai ashi.

Iba sentong ya magidang Town Hall, Mokokchung nunga sentong ka District Administration aser District Level Centre for Women-MSK (Beti Bachao Beti Padhao) Mokokchung ajanga ayongzüka liasü, kong frontline worker tetsür ter nem tetushi agüja liasü.

Iba sentong nung Deputy Commissioner, Mokokchung,

Limawapang Jamir tesemdanger tongti liasü, aser tashidak wara den anibelem mesasai raraba asoshi pai tetsür frontline worker tem dang pelaba metetdaksü.

Iba sentong nung Women Sanitary Workers - Masasula, Bendangmenla, Ozungtula, Tsungo aser Sashilila; Medical/Health Worker- Dr. Chubala Aier, CMO Mokokchung, Narosenla, Microbiologist IMDH Mokokchung; Women Police- No. 3889 W/P THC Kirejungla, Women Police Station DEF; Civil Society-Maonginla, Watsu tir, Shilula Imchen, Asso. Pastor Women MTBA nung nem kulikaket den senpet agüja liasü.

Iba anogomung nungtem nung Royal Enfield Club, Mokokchung ajanga Mokokchung jila nung tetsürtem nem naro lema agüja liasü.



(Abelen nungi) Akhil Gogoi aser Lurin Jyoti Gogoi. Assam nung regional party tasen ana-Assam Jatiya Parishad (AJP) aser Rajior Dal nung tirtem Lurin Jyoti Gogoi o Akhil Gogoi nati Hombarnü Assam Assembly elections nung tokteptsü atema tenüng agütsüogo. AJP president Lurin Jyoti Gogoi-i Duliajan aser Naharkatia constituency ana nung tokteptsü aser pai tanü Dibrugarh nung Returning Officer tsüngdang nomination papers agütsü. Külén, Rajior Dal president Akhil Gogoi-ia Sibsagar aser Mariani constituency ana nungi tokteptsü atema tenüng agütsüogo. "Akhil Gogoi-i video conferencing ajanga Returning Officer nem nomination papers agütsü. Iba mapang election telok kati Gauhati Medical College Hospital (GMCH) nungi Akhil Gogoi indang nomination papers meshi.

Mizoram: BJP züngsem 479-i Mizo National Front nung aden

Aizawl, March 08, 2021 (Agencies): Chakma district nung BJP khuret tuluka ajurutsüsa Chakma Council indang Parva MDC constituency nung BJP pusemer nisung 479 tashi Mizo National Front (MNF) nung denogo.

Chakma district BJP tongti lennir aser general secretary (organization), Dangu Prityrup Chakma-i CDBJP lenisüba dak tamang makatetba indang metetdaksüba sülen MNF den teka amteptsü asoshi telemtetba tulu agiogo.

Hokolbar nikonddang Chakma Autonomous District Council (CADC) chief executive member (CEM) Dangu Rasik Mohan Chakma, pa den külemi inyakertem aser MNF tongti lennir kar densema MNF telok ka Parva tonga aru.

Parva ya Indo-Myanmar aser Bangladesh arretsülen lir.

MNF teloki Parva tonga aodang yimer aikati MNF pusemba yimiyim ayima pelashishia agizük aser parnok

nem narozük inoktsü. "Lokti sentong ka nung züngsem tasen 479 agizükogo. 2018 küm office maparen inyaksü tenzükba sülen CEM Dangu-i iba constituency mezüng semdang alitsü," ta Mizo National Front Kamalanagar sangdong ajanga metetdaksü.

Parva constituency nung yimtsüng trok- Parva I, Parva III, Parva IV, Bundukbanga, Gobasury aser Siminasora dena lir. Item yimtsüng nung vote enoktsür 1970 lir aser Congress nungi MNF MDC melensang Dangu Mohan Chakma indang constituency lir.

Rasik Mohan Chakma lenisüba Sorkar kübok Changma-i rural development, road transport and waterways mapa bena lir.

Tang yimtenren nung iba terenlok maparen ya tesümgangtsüka aser kodanga matalokdangba ka lir.

Dangu Prityrup, shibai BJP ticket ngua 2018 CADC poll nung toktep, pa ya Dangu

Mohan Chakma den tetokteper tajung ka liasü.

"Prityrup aser pa pusemer ajak - 479 MNF den teka amteptsü atema BJP toktsüba ajanga, tang Parva ya opposition maliba constituency ka kümogo," ta kasa sangdong nung shia lir.

Prityrup-i anir lokti ka MMF den teka amtepsba ajanga CADC MNF lennirtem nungi telangzüba tajung nguogo.

Osangbener den jembiba mapang, Dangu Rasik Mohan Chakma-ia, par sorkar dak tamang kateta aser pusemba atema nüburtem dang pelaba metetdaksüogo.

BJP toktsür sülen MNF nung kara dang adentsü asoshi kechi ajanga ajungmeso ta asüngdangba mapang, Dangu Prityrup Chakma-i ashiba agi, "Mapa medeni pungmanga dang kazüra kecha mataloktsü. Tulu süshia mesüra tila süshia anogoshia nai inyakba ajakji nü mangdang tulu ataloktsü asoshi mera agir ama lir.

AIUDF-i candidate 16 indang mezüng list sangdongogo

Guwahati, March 08, 2021 (Agencies): Assam Assembly elections 2021 atema Maulana Badruddin Ajmal-i aniba All India United Democratic Front (AIUDF)-i Deobar aonung candidate 16 indang mezüng list sangdongogo.

Assam Assembly election nung AIUDF-i Congress den lokteper tokteptsü.

Congress-i aniba telokteper nung AIUDF, CPI, CPI(M), CPI(ML), Anchalik Gana Morcha aser BPF dena lir.

AIUDF president Maulana Badruddin Ajmal aser general secretary (organization) Aminul Islam nati sign asüba candidate indang list nung Jamunamukh menden atema Sirajuddin Ajmal-i tokteptsü shia lir.

Bilasipara West constituency nungi Hafiz Bashir Ahmed, Mankachar constituency nungi advocate Aminul Islam aser Dhubri Assembly constituency

nungi Nazrul Hague nungeri tokteptsü.

Tanga constituency nungi candidate temji- Nizanur Rahman - Gauripur, Sri Foni Talukdar - Bhawanipur, Karim Uddin Barbhuya - Sonai aser Alhaj Aminul Islam - Dhing nung alitsü.

Jonia menden nungi tokteptsü atema Dr. Hafiz Rafiqul Islam nem party ticket agütsüogo. Algapur menden nungi Nizamuddin Choudhury tokteptsü.

Katlichera menden nungi tokteptsü atema Sujam Uddin Laskar nem party ticket agütsüogo.

Grand alliance candidate den 'friendly contest' atema shimtetba party candidate temji Minakshi Rahman - Sarukhetri, Rafiqul Islam - Jaleshwar, Mujibur Rahman - Dalgaon, Ashraf Hussain - Chenga aser Rajib Ahmed - Bagbar nung alitsü.

Assam Rifles-i Rs 52 lakh alangba cigarettes apu



Aizawl, March 8 (Agencies): Mizoram nung Assam Rifles sepaitemi Rs 52 lakh alangba foreign cigarettes aika ngutetogo.

Osang tejangja ka angazükba sülen Assam Rifles sepaitemi ozüng alema shibelenba mapa mita ao.

Osang angazükba sülen COB (Company Operating Base) Champhai, 8 Assam Rifles-i Champhai-Chhungte-Aizawl Road nung mobile vehicle check (MVCP) ka lapok.

"March 6, 2021 anepdang 12:10 ako meta parnoki nisung kar khu

bener aruba nung temolung meleme bilem. Parnoki sepaitemi apu aser spot-checking asü" ta Assam Rifles-i metetdaksü.

Iba mapang foreign-origin cigarettes case 40 bena aliba angu. Nisungtem jagi kulikakettem aser temelaba kecha melii Aizawl-i cigarettes miima bener arurba liasü, ta AR-isa ashi.

AR sepaitemi nisung ana aser Classic Peacock cigarette case 40 apu.

Nisung ana den tena ket nungi apu cigarette ji Customs Preventive Force Champhai District ket nung agütsüogo.

Congress candidate shimba nung high command tebang mait: Jitendra

Guwahati, March 8 (Agencies): Assam Assembly elections atema candidate shimba nung New Delhi nung party high command-i tebang mait ta Assam Congress in-charge Jitendra Singh-i ashi.

Nagpur lenisüba kübok New Delhi ajanga Assam Assembly election atema BJP

candidate tem shimogo ta Jitendra Singh-isa ashi.

"Congress high command nungi meinprong kecha mali. Candidate shimtsü atema Delhi-i shinga mao. Ajak Assam nung dang inyakogo" ta paisa shisem.

"Assam nung BJP pur candidate shimtsü atema Delhi-i ao. Nagpur tetuyuba

nung New Delhi-i BJP indang candidate tem shimogo" ta Assam Congress in-charge-isa metetdaksü.

"Congress selection committee-i candidate tem shimtsü atema Assam-i aruogo. State nungi shinga Delhi-i aotsü nungdak madok" ta paisa ashi.

"Congress-i Assam nung Assam atema telemtetba ajak agir" ta paisa shisem.

Assam nung Congress züngsem shiai iba election atema kanga meranga inyakdar, ta Jitendra-isa ashi.

"Nisung ajak Congress worker ka. Lok Sabha MP tem- Abdul Khaleque, Pradyut Bordoloi, Gaurav Gogoi mesüra APCC president Ripun Bora mesüra AIMCC president Sushmita Dev nung süang, ajak Congress mapa inyaker kaka lir" ta paisa metetdaksü.



Assam Rifles-i Arunachal Pradesh Police den külemi National Socialist Council of Nagaland (Isak-Muivah) ka apuba sülen agiba noksa angur. Arunachal Pradesh kübok Tirap district nung aliba Hollam yimtsüng nung NSCN (IM) züngsem ya apu. (Itanagar, March 8)



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 09, 2021

YI YA SHIRNOK ASOSHI ?

Nagaland nung government-i yi ayoktsü özüng azüng saka özüng yanglurtemi anir nübertem aikati yi ajemer aser tajemer aliba agi tayokertema aika kümogo. Ibayongji, nübertem rongnung kari Nagaland nung yi mayoktsü özüng lateta aliba ya agientsüla ta bilemer saka ano karibo tajemera liang aser tayokertema liang, yi ayoktsübo memelatsüla ta bilemer. Iba tetsüngda nung, yi meyanglutsü aser mayoktsü özüng lateta aliba ya government-ia mapa kuma akanga mebenshitetter aser tagiena magientetter ta timtemba angur. Atangji, Nagaland nung yi mayoktsü özüng azüngba ya government-i junger ta bilemba agi masü saka arogo nunger lenirtemi anung marem latetba özüng ka lir. Iba jagi tanga government nung alirtemibo yokner saka arogo nungertemi ano anema apuso tsübuba agi arendaker amato repranger. Ajisüaka, arogoibo kodanga yi yangluang aser yokang tabo mashitsü, anungji government nung alirtemi asen lima nung yi yanglua ayoktsübaji junger ta bilemra parnok mulung asütsüla. Ajisüaka, Nagaland nung government nung alirtem o arogo nung alirtem naji nisungbo ka dang lir, kechiyong ajak Khristan purtem lir, anungji kasa nisungi tenla kidang Tsüngrem dang Nagaland nung yi yangludi aser yokdi ta masüngdangtet tashi, Nagaland nung yi yanglua ayoktsü melatsübaji Tsüngrem tsübuba mulungjangibo magizüktettsü. Atangji, yi mayoktsü nokdangba agi nisung aika yi yokaa takar kümogo, kechiyong özüngi memelaba oset aser chiyongtsü asünungji jenjang tasak agi ayoker. Ano, yi yokdaksünertemi ashiba kuli tajung kaji, yi mayoktsü özüng aliba agi yi jenjang kanga tasak akümba dang masü saka temelaba melii yangluba ya tamajung angur, anungji nisung aika yi tamajung ajemba agi tashidak adoka melamelaa asür. Ano, kuli kaji Nagaland ya Assam den artsü lir, anungji Assam nungertemi artsü anasa Nagaland tonga aruagi yi dokan lapoker, anungji Naga nunger yi ajemertem sen ajunga yangji agütsür. Item kulitem ajakji shitak lir, ajisüaka shibaibo pei chirnurtem dang yi jemang ta shitettsü ? Item tensa tiaji kodang bilemdangdir, yi yokdaksünertemi ashiba kuliji shitakba nungbo yi yokdaksünertem aser jemdaksünertem masü saka özüng shitak mamshitetba ajanga özüng ya maliang tajungba ta shinür ta angatetter. Atangji, peii memelungba mapa ka mulungsua inyaksübaji tasak aser peii chia ajemba chiyongtsü ka nokdangtsübajia tasak, anungji Nagaland nung yi meyangluli aser mejemli süra özüng yanglurtemi anir özüng kübok alitsüla. Aji mesüra, özüngji agientsüla. Tanü Nagaland nung yi mayoktsü özüngba azüng saka yi talubo angur ta asüba tamakok ya asenok aikati arogo nunger tamakok amato bilemer, saka özüng mamshitetba tamakokjibo özüng yanglurtem tamakok asütsü. Arogo-ibo özüng agi masü saka temeim agi arogo nungertem dang masü saka limapurtem dena yi mejemdaksütsü asoshi tangatetba agüja yaritsüla. Aji oda, arogo karibo yi meyokdaksünüba agi yi ayoker kibong kar nembo tanga business inyadaksütsü atema ajungshia arogo senpong nungi sen agütsüba osanga angashir. Aji kanga junger. Arogo mapaji aji asütsüla. Aji nütsüngsüba aser santem ki tonga oagi anepaluba mapa lir. Atangji, tajung kümnertem asoshibo arogo nunger ki tonga aruagi yaritepdangji lenmang tajung shimteta kibong taküm lenmang yanglutsüba mapang tajung asütsü. Iba kasaji tajung kümnertem asoshibo yi meyanglutsü aser mayoktsü nokdangba mapangji yi toktsür taküm yanglushiba mapang tajungtiba asütsü. Lashibaia ashir, yiji chuba aser yimsüsürtem asoshi masü, parnoki yi mebushitsüla. Parnoki yi jemer parnoki (yangluba) özüngtem amatsü aser timtemertem asoshi indangindanga meinyaktsü. Yiji samatsü renema alirtem nem jemdakjang aser parnok timtem aser sensak tia amadakjang. (A. Shin 31:4-7.) Iba Laishiba ya azüngdang, süra Nagaland nunga pei taküm aser pei kibong samatsü renema alirtem ajemtsü asoshi yi yokdaksütsü na (?) ta bilemer. Tanü putu yabo moko dena kima yimdong nung chia mesenzüdaksüba putu lir. Item ajakji asen temang anema alitsü asoshi lir. Aji oda, yi agi asen taküm aser kibong raksatsür süra akok tashi mayokang aser majemang tajungba asütsü.

OLEMSABANG

NBCC & ABAM CLEAN ELECTION INYAKA ARUBA NUNG TAKOK ASER TAMAKOK

~ Rev. Ayutemjen, Pastor, Dibuia

(Yashi adok nungi...)

TAKOK ASER TAMAKOK ASADANGBA

Takok:

1. Atangji, tang Nagaland tatar senden nung amener Aor tatartem jakla yimya (moral integrity) tajung amai repranger aser parnok karibo tatar senden nung shilem kanga junga agiba angur. Iba denji Aor tatartem rongnung yi jemer aser shi azü mazüoki senzüba kangabo mangur. Clean Election takokji aji ka asütsü, kechiyong Clean Election yimyimji Tsüngrem tsübuba aser nüburtem meimba lenir adokdakjang ta ayimba yimyim.
2. Clean Election ajanga tajungshiba ama tashi angaa pei kidang wako temesüng songa yur, pei tangatetba nung Tsüngrem tenüng nung tenangzükba agir indang indanga vote agütsüba purtem aika liasü. Item rongnungji tashiyim amshiba ajanga tesüiba election-tem aika nung polling station mungudang aser vote agütsüba yimya amadoker aliba sensosangertem aika liasü, saka parnokji Clean Election yimyim ajanga taoba election nungbo vote shitak agütsütet. Nisung kari dang tashiyim agi meyongnem agütsüba ajema aküm.
3. Clean Election ajanga akhi ama party kimen aser Youth Camp memesem, aser tesem kar nungbo candidate-tem common platform kati jadana jembidaktsü. ABAM-ibo candidate ajak Impuri jaoker mapang tatsütsü jembidaktsü aser parnok asoshi ABAM-i sarasadem agütsü. Item jagi tamajung inyaksüba nungi meteta aser memeteti tuluka nokdangogo.
4. Clean Election takok asoshi Clean Election Sunday aser sarasadem yinzü sentong maneni agibatem liasü. Item jagi nüburtem nem tangatetbabo apuoktsüogo.
5. Clean Election sentong ya revolution ka masü, anungji manger sangwa nung tamajung aser meshitak mapatem inyaka aruba ajakji matsüngdaktettsü. Ajisüaka, Clean election mongjenbo mesemtetogo, ronübo sayuogo. Aji mezüngba takok asütsü.
6. Ano takok kaji, tezü medangi nangzükba ama maneni inyaka aotsü mulungtetba aser tanü lanurtem aikati Clean Election nükjidong angateta akümba ya asütsü. Aji oda, Clean Election sentong takok ngua jangrupet jangrutsü asoshi aputeta yutsüba mimongji aji asütsü.

Tamakok:

1. Lenir ta takok aser tamakok asadangbaji pai/lai lokti terenlok asoshi kechi inyaker ta asübaji lir. Tatartemi election nung nangzükba ama inyakteta lir mali? Mali ta ajaki shitet. Terenlok inyakbaren aser rongsenren nung nüburtem ajungkettsüsa inyakba aser lokti ajangzüktsüsa gari lenmang, mozü ki aser school kitem tajungba kuma inyaksüba mali. Nüburtem ongzüka achitsüsa süngjang tajung atangba mangur.
2. Clean Election sentong ajanga nüburtem dang Election nung pei vote sen aser mapayong mayoktsü ajang-ajanga ayimokajaka, taoba election nung toktepertem aika sen crore aika endoka tokteper otsü lir. Iba election sentsü jagi nenneter tadokertemang shisa tebuluba aser madoketemang khuret tuluba ta election nung tokteper aika kanga shisabulu tia nung aliba angur.
3. Ano tamakok kaji candidate tajung apia masü, saka pei yimer apia senso candidate shimba aser senso mungdangi ashiba mangara vote dena meinokdaksüba tatalokbatema tesem kar nungbo liasü.
4. Arogo tsütsü Clean Election tongpang nung tamakok kaji tetsübu aser tarendak agi Khristan anemba yimden telok anema yimyim magütsütet, iba jagi shirnoki Hindu yimsü tsütsü atsünga yimsü asütsü meranger, parnok nempoka aitaoktsüogo. Clean Election ken nung "Khristan yimsü anemba telok" ta aliba tekong dena atentsü arogoi tasü meittet.
5. Clean election tongpang bilemba aser imlaba ama tashi itta moutetba kuli kaji, arogoi ayongba tongpang ser nung, yimtsüng aser jila aika nung sannüker kija toktsür deacon aser mapangsertemiang candidate-tem dang nungi sen meshia nübo yima jajaba purtema liasü. Iba jagi Clean election sentong menüdong kümdaksü aser arogo purtem mulung mekottet.
6. Tamakok tulutibaji, Clean Election sentong nung tongti shilem agir kati jembia jajaba ama mapa agi shitak inyaka mesayutetba aser election nung tamakok angubaji asütsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pope Francis-i Iraq nung teimla aser tesünep osang sangoktsü



Bhagdad, March 08, 2021: Pope Francis-i anogo pezünü Iraq semdangba sülen March 8, 2021 nü Vatican-i meyipa aotsü atema Baghdad airport nung tayimtsü kati ayaketdang tangokba noksa nung angur.

Bhagdad (Iraq), Metsüremi/March 08, 2021: Pope Francis-i anogo pezünü Iraq semdangba mapang sorkar ketdangsertem aser Muslim nunger lenirtem dang linük nung tesünep alitsü atema senso ajaki akhümtsübutepa adianu ama alitsü atema ayongzükba sülen Hombarnü pa Vatican-i meyipa ogo.

Pope Francis-i linük semdangba ajanga linük nung aliba Khristantem nem teimla tasen ka agütsüogo.

Pope Francis-i Iraq nung province pongu tashi sema senzüba sülen pa den pa miena arurtem asoshi Baghdad airport nung tepila sentong ka agia liasü. Pope amenba tayimtsü apusoa aodang

Iraq Tir, Barham Salih-i teka ayiploksü, ta osang ka ajanga metetdaksü.

Francis-i Iraq nung tesem balala semdangba mapang nung pai Iraq nunger dang south tsütsü Najaf (pai Muslim nunger tongti lenir Grand Ayatollah Ali al-Sistani ajuruba tesem) nungi north tsütsü Nineveh (IS kiralongrartem ajanga takoksa angur Khristantem pai ajuruba tesem) tashi nung senso ajaki akhümtsübutepa alitsü ayongzükba liasü.

Küm ishika tejaklen Iraq nung IS kiralongrartem raksatsüba tesem aika Pope-i semdang. Iraq south tsütsü Francis-i Ur nung Iraq nung

tamangba yimsü balala nungi lenirtem den senden amen. Iba tesemji Yihuda nunger, Khristantem aser Muslim nunger ajaki tebuti ama züngshiba, Abraham asoba tesem lir ta amanger. Iba senden nungji Iraq nung Muslim, Khristan, Yazidis aser Mandaeans lenirtem ajak aden. Senden nung Pope-i yimsü balala ajak nungi lenirtem dang linük nung yimjung aser tesünep

alitsü atema ajaki longjemer inyaksüala, ta tayongzükba agüja liasü.

Najaf yimti nung Francis-i Muslim Shia tongti lenir Grand Ayatollah Ali al-Sistani den nija senden ka amen, aser tenapronglai nübur ajak tsüngda akhümtsübutepa alitsü ayongzük aser Iraq nung Khristantem temeden kümzükba ayutsü bangjema liasü.

Sistani'er kidang senden amenbaji Pope ka aser Grand Ayatollah ka na tsüngda mezüngbuba senden amenba liasü; iba senden amentsü atema ita aika jelia sentong renema liasü.

Amongnü taoba mapang IS kiralongrartem "caliphate" amenokba tiyongtsü-Mosul yimti nung Pope Francis-i Arogo pezü-Syriac Catholic, Armenian Orthodox, Syriac Orthodox & Chaldean Tenla kitem teraksa tiyongtsü nung sarasadem sentong ka agi.

Taoba mapang Khristantem jila, Qaraqosh nung IS kiralongrartem Khristantem mindoka liasü, aser iba jila nung jembidang Pope-i Khristantem dang parnok anema inyakerter dang tai tokang aser asentenshir taküm tasen tenzükang, ta ayongzükba liasü.

Coronavirus wara liaka Pope reprangdangnertem jenti liasü aser pa aolen ajak lokti tulu adenshi.

Health tsütsü mongin karibo, Pope sentong ajak nung lokti tulu adenshiogo, saka nisung kari dang mask agi, anungji linük nung coronavirus asentenshir prokshitsüa akok, ta ashir.

March 6 nüa Iraq nung nisung 4,068 dak coronavirus tashidak puteta liasü. Linük nung nisung ajak agi 7,20,000 dak iba tashidak putetogo aser iba nungjagi nisung 13,500 shi süogo.

Pope Francis-i Middle East nung rara agi tamajungba kongshiba linük (Iraq) semdangba ajanga Iraq nung dang masü saka Arab lima tashi nung tamangba yimsü balala amanger ajak nem teimla aser tesünep osang sangdoktsüogo, ta aikati bilemer.

American University of Beirut nung Issam Fares Institute for Public Policy & International Affairs nungi Dania Koleilat Khatib-i, "Pope-i semdangba ya region nung Muslim nungertemi junga agizükogo. Pai Iraq semdangba anema kari danga longkak aitba nai osangkakettem nung züngshir ma? Ni-a Muslim tsür, aser pai semdangbaji onoki pelaa agizükogo," ta ashi.

"Nisung timbakati pelaa agizükogo ta ni bilemer. Iba dak sendakba nung survey magi, anungji shilem kwii pela agizükar memetet, saka timbakati pelaa agizükogo ta ni bilemer," ta lai Dubai yimti nungi phone ajanga metetdaksü.

al-Azhar University nung Grand Imam aser Sunni Muslim nunger tongti ketdangser, Sheikh Ahmad el-Tayeb-ia twitter ajanga, Pope Francis-i yimjung osang prokba atema pelaba lemsatep.

Pope Francis indang 'followers' rongnung Shiite Muslim nunger-a million aika lir. Shiite Muslim nunger ya alima nungbo minority saka Iraq nungbo majority lir.

Al-Sistani-i sangdong ka ajanga, linük nung Khristantema tesünep nung alitsüala aser temeden ajak amshitetsüa alitsüala, ta metetdaksü.

Pope Francis-ia al-Sistani-i Iraq nung rara tamajungba aliba mapang nung Khristantem atema ola adokba atema pelaba lemsatepa liasü.

ANOGO ABEN TSÜNGREM DEN

BENDANGA AGÜTSÜBA TAKÜMJI TERONEM TENLA

"Aser Khristai kechi koda nenok meim aser teronem tanang atema tenla ama Tsüngrem nem asenok asoshi pei sasa bendanga agütsü, yamaji nenoki temeim nung jajang." (Efesa 5:2)

Lipok mapang nungitenzükba nüburtemi teronem menemba totzü Kibuba nem tenlaba angur (Lipok 28:18; 31:13, Anitet 30:34-38). Item teronem menemba tenla Kibubai menemnüba tarongba tenlatem liasü. Yisui pa takümüji item teronem menemba totzü koba Kibuba nem tenla-a aru iba den pa taküm atishi. Teronem menemba totzü kodang shiloktsüdir iba temeket ajunga nung teronem tanang menemba kisüngji masü, saka shiloktsüba totzü koda tanaben shia marutet yamaji Pa taküm bendanga agütsübaji teti asoshi liasü.

Yamaji asenok taküm Kibuba nem pa tenzüksü asoshi bendanga agütsübaji totzü shiloktsüba koda tanaben bena marutet yamaji asenok pa nem taküm, sempet, aser tenzükba item ajak bendanga agütsüba alitsüala. Iba akümüli nung Yisui pai mulungba ama masü, saka Tebu meimba tamaittsü taküm rangben Tebui mulungba aser tenyaba nung dang alitsü merang. Asen taküm-a Kibubai kongi jadiri aser koloni anidir aotsü mulunga aliba tanela akhanger. Kibuba agizükba teronem tenlaji nai bendanga agütsüba agi dang metentsü.

SARASADEM

Kibuba Yisui ni kü taküm, sempet, tenzükba ajanga ni ne nem bendanga agütsüshir. Nai agizükangma. Amen

Karnataka nung pastor ana dak azük

March 08, 2021: Karnataka nung pastor ka jabaso asoba anogomong sentong ka nung Hindu yimsü alia amanger telok kati pastor ka densema Khristan trok dak azük.

March 1, 2021 nü Pastor Sadashiv Raju'er jabaso asoba anogomong sentong agiba mapang Bajrang Dal züngsem 25 shi arua Khristantem dak azük.

Osangbener den jembidang pastor Raju-i, "Ni shinga danga tamangba yimsü meyiptsü majungshir, saka kü dangi arurtem ajak asoshi ni sarasademtsür. Ni sarasademtsüba sülen karbo shirang anepadoker, ibayongji

parnoki Tenla kidangi arur," ta ashi.

Osangbener den jembidang Evangelical Hindustani Covenant Arogo nung pastor, Samuel Bhalekar-i, "Chitradurga district kübok Idga yimdak Pentecostal Arogo nung pastor kidang ken tashii atembaji Hindu nunger jagi maginüli liasü, ibayongji parnok arua Khristantem dak azük," ta ashi.

"Pentecostal pastor temi police station nung FIR ka benok saka police-i kecha meinyaker. Kasa telok jagisa Sitapur yimdak Assemblies of God Arogo nung pastor den Khristan ana dak azük," ta Pastor Bhalekar-isa metetdaksü.

Indonesia nung St. Lidwina Arogo Tenla ki amaksang süogo

March 08, 2021: Indonesia nung Gamping District nung aliba St. Lidwina Bedog Catholic Arogo Tenla ki amaksang, Suliono süogo; East Java nung Pesanggaran Subdistrict kübok Kandungan yimdak nungi kiralongrar, Suliono tasümgang March 1 nü par jila nung remtsüogo, ta Hombarnü osang ka ajanga metetdaksü.

2018 küm February 11 nü St. Lidwina Bedog Arogo Tenla kidang tekülem sentong tagidak mapang nung Suliono-i noklangnok ka bener arua sentong lenir pastor, Karl Edmund Prier densema Khristan pezü yiruja liasü. Suliono-isa Tenla kidang sabang anasa aliba Yisui Khrista aser Mari na indang kürakyanglutem rasaka liasü.

Suliono Tenla ki telungi aitba sülen choir amenba tsütsüleni oa choir kentenba anisang, pastor Karl Edmund Prier dak lepoktsü. Iba sülen Budijono aser Martinus Parmadi Subiantara na den police officer, First Inspector Adj. Munir nungera yiruja liasü.

Tesülen police arua anünglen injang khadok saka pai ajentsü merangba agi pa dak tebok nung injang khalokja liasü. Iba sülen pa mezüng Gadjah Mada University Hospital-i anir oa yari aser tesüsa Bhayangkara Police Hospital-i anir oa liasü.

Police-i ashiba agi, pa temang nung timtem balala adoka asü. Pa asüpila sentong nungji police aser Indonesian Army (TNI) sepai 15 nem security mapa lemsükja liasü.

OLONG PAITEP # 5747

	1		2			3		4		5
6								7		
					8		9			
			10							
11										
				12						
13		14		15						16
17								18		

- | | | | |
|------------------------------|-------|------------------------------|-------|
| TIPILEN | | LANGTSÜNGLEN | |
| 1. Inyaker ajangetba | - (3) | 1. Meshidak | - (3) |
| 3. Bangsemo adokdak | - (5) | 2. Tanaben soshir | - (7) |
| 6. Shitak mesüi inyak | - (7) | 3. Iba anogo | - (4) |
| 7. Ya mimong nung angur | - (3) | 4. Meshi | - (3) |
| 9. Reprangzük | - (4) | 5. Yagi mi tsükloker | - (9) |
| 10. Tasola | - (5) | 6. Shi tapu ka | - (9) |
| 11. S _ _ _ _ | - (4) | 8. Yagi ayimer saka ozü masü | - (3) |
| 13. Yagi ajak ashiochtsür | - (3) | 9. Ajokba shiruru ka | - (7) |
| 15. Ki aokba oset | - (7) | 12. Inyaktet | - (4) |
| 17. AK shi nung inokba tasen | - (5) | 14. _ _ _ hi | - (3) |
| 18. Ishika | - (3) | 16. Akümüli nungi pilar | - (3) |

OLONG PAITEP # 5746 TELANGZÜBA

- | | |
|---------------------------------------|--------------------------------------|
| TIPILEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük. | 12. Sempa, 13. Jahaz. |



WATSÜLA O WARAKLA NA JALA-JABASO INDANG OTSÜ ATONGER

Watsüla : Hai... Elangla junga lir sudi ??? Koa tanurtem kongisa orr na ne kija yamai azüng-azünga kazür noo ???

Warakla : Ayyyaaa...Elangla tanurtem ajak duetion agitsü yoker ni sorochocha kazür adii.

Watsüla : Waammaaaa...!!! Kodaser tangar Tesayur nem-ang duetion agidaktsür akaaa ??? asenoka tangar ama degree tulu mazüngyongjia Gratuate-bo suogo-do. Anungji oda asen jala-jabasotembo akokba tashi aseni duetion agitsüla ado..... Kechiba duetion atema tangar nem sen noklang/merijang aika agütsütsü...!!!

Warakla : Eeesssh...Elangla ni tanur dang lesson sayua duetion agitsüba mapang kheni mali. Watsü telok mapa...Mahila telok mapa...Self Help Group telok mapa...Elangtsür telok mapa....Arogotzür tenzükla mapa...ano khen khenbo tilateri shishilempa mapa. Ayaaa... mapa zünger mezüngma nung ...Ni kodaser ozü tanurtem duetion agitettsü.

Watsüla : Ayyyaaa...Elangla tanu putu nung asenok tsürabur aikati jala-jabasotem tangar Tesayur nem duetion agidaktsür-a ta asüba ya 'Fashion' ka amai kanga nümadanga konang-nungsang amai jembir tang ashi...Shitakba-bo asenoka Gratuate sua azüngbaji School nung Tesayur-sa meinyakyongjia kidang asen jala-jabaso duetion agiba nung sen meintoki kümzükbaji danga tajangzük ado... Oda asen kinungbur itasen agi chiyungtsü... abensuoshi...school fee... ano aika... ajia meperir nung koda...????!!!

~ L.Kika Pongener.

AO OSHI ANGAZÜKDAK:
TANÜ ANGAZÜKTSÜBA OJANG

Aneb
 (v.) kulep (fold)
 * Kaket ajak ya pai aneb.

Aneb
 (v.) neplok, malok.
 * Lai jara nung medemer noksa aneb.



NAI-A YA METETTER MA?

Scientist temi mopung aser lung dena aliba alima mesük exoplanet (Solar system tema nung) ka ngutetogo, koba ajanga asenok solar system adena orr atmosphere aketba planet ka bushisüngdangtsü asoshi researcher nem maongka agütsür. Tesüiba küm 20 tejakdanga scientist temi lung, ice aser gas dena aliba exoplanet tem nguteta lir aser tawa tanü scientist ket nung aliba hadir/gol tem (instrument) amshia alima mesük planet tem indang tzü -mopung (atmosphere) tendangtsü/bushisüngdangtsü ya kanga dang tasak. Iba timtem aser oset peria maliba ajanga item planet indang atmospheric model tendangtsü makoker. Tang researcher temi ana meta aliba 'red dwarf star' orbit nung 'Gliese 486 b' 'hot super-Earth' ka ngutetogo. Gliese 486 b ta nüngja jatettsüba planet tasen ya Anü (Sun) nungi light year 26 pilar orr lir.

TANÜBO NAI LANGZÜANG

Q. Nag Ayong ya ___ nung lir.
 A. Nagpur B. Nagaland C. Tamil Nadu D. None of the above

—————(Taruba adok nung onoki langzüksü)

YASHI ADOK TELANGZÜBA : Netflix

SUDOKU # 5788					TELANGZUBA # 5787											
3			9	2	5	7	1	7	3	9	6	2	4	8	5	
5	9						9	2	6	5	8	4	7	3	1	
4		1	5				5	4	8	1	7	3	2	9	6	
	7			8	4	9	3	7	8	5	3	9	6	1	4	2
			7	5		6		2	6	1	8	4	7	9	5	3
			1	9		7	5	4	3	9	2	5	1	8	6	7
6			3			4		6	5	7	4	2	9	3	1	8
	5		8	7		9	3	3	9	2	6	1	8	5	7	4
	1	3				5		8	1	4	7	3	5	6	2	9

OJANG LUTEP # 5334

TSMOTEAÜ :

NGJUA :

GITEMATI :

EMESÜITR :

ABETANN :

ANGDMERANG :

ASAK :

EZÜMNG :

BOAMA :

GITMAET :

OJANG LUTEP TELANGZÜBA # 5333
 OLULU AMA DANG ANGASHI SAKA MEIMLAI DOKTSÜBA
 ASANGSANG NUNG ATALOK

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzük nunga koma süla?

Olong 20 shi nung March 12, 2021 tashi nung iba telangzuba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.

Kobi melii Modi-i linük nüngja-a pa tenüng agi melentsü: Mamata



Kolkata, March 08, 2021: Hombarnü Kolkata nung West Bengal Chief Minister, Mamata Banerjee leniba nung tetsürtemi International Womens Day rally nung shilem agiba noksa nung angur.

Kolkata, March 08 (Agencies): Hombarnü West Bengal Chief Minister, Mamata Banerjee-i, Ato kilonser, Narendra Modi-i lar party-TMC anema tiyazü aser olulu proker, ta aitsü.

Taruba election nung voter agütsüsupurtemi state nung aliba constituency 294 prongla nung "Didi (Mamata) aser BJP" tsüngda tongbang ajurutsü, ta lai ashi.

Mamata-isa, Ato kilonseri Covid-19 vaccine certificates nunga pa noksa amshiba aija, "Linük nüngja-a pa tenüng agi melentsü menoa mali," ta ashi.

West Bengal nung lai tasembenbuba takok ngua sorkar akümtsü, ta shia Mamata-i, "Menden 294 prongla nung iba tongbang ya ni aser BJP tsüngda asütsü," ta ashi.

International Women's Day nungtem nung Kolkata nung la leniba nung tetsürtemi rally ka nung shilem agiba sülen lai, "Parnok (BJP lenirtem) election mapang nung ang Bengal-i arutsü aser yazü den olulu proktsü. Tetsürtem kümzüka alitsü atema pai (Modi) asenok nem tesayuba agütsür. BJP-i yimsüsüba state tem nung

tetsürtem tia koma lir? Modi-i sapuba Gujarat nung tensa koma lir?" ta asüngdang.

"Ato kilonseri stadium ka nem pa tenüng jaloktsüogo. Pai COVID-19 vaccination certificates nunga pa noksa inokogo. Linük nüngja-a pa tenüng agi melentsüsa anogo ka ajurutsü," ta TMC tongtisa aitsü.

Tawa Ato kilonseri, Bengal nung tetsürtemi parnok kümzüka lir amai mebeilemer, ta jembiba o aija Mamata-i, "Yangi tetsürtem anema inyakba ken o ali asü, yamaji asübo tetsürtemi aonung sademsadema mesenzütetla," ta ashi.

Laisa, Modi aser Union Home Minister, Amit Shah nati model state Gujarat densema BJP-i yimsüsüba state tem nung dang rangloksüla, item state nungji tesüiba küm ana tashi anogo shia tetsür raksatsüba ken o pezü aser tetsür tepsetba ken o ana benoker, ta ashi.

Hombarnü TMC rally ya yimti nung College Square area nung tenzük aser kilometer pongu jajar Dorina crossing anasa tembanga liasü.

Iba rally nung party lenirtem Chandrima Bhattacharya aser Mala Roy na den taoba mapang actress tem aser tang TMC candidates- June Maliya, Saayoni Ghosh aser Sayantika Banerjee nungeria shilem agi.

Taoba mapang Rajasthan aser Gujarat Angh, Anshuman süogo

New Delhi, March 08 (Agencies): Taoba mapang Rajasthan Angh, Anshuman Singh temang nung timtem kar adokba sülen Hombarnü alima nungi pilaogo; pa arrshi küm 86 liasü.

Pa asüba osang angashia mangyim lemsatapa Rajasthan Chief Minister, Ashok Gehlot-i twitter ajanga, "Rajasthan aser Gujarat Angh inyaksang, Justice Anshuman Singh asüba osang angashia mangyimer. Judiciary aser yimtenren nung pai inyakba mapatemji teti bilemtetsü. Iba mangyim koktetsü atema Tsüngremi par kibong züngsemtem nem tashi agüjang aser asür tanela tesünap nung anisüngzükdakjang ta sarasademtsür," ta lemsatap.



Anshuman Singh ya retired Justice liasü; 1998 küm pa Gujarat nung Angh inyak aser 1999 nungi 2003 küm tashi Rajasthan nunga Angh inyaka liasü.

Pa 1935 küm Allahabad nung asoba sülen arts aser law azüng

Intl. Women's Day nü tetsür MP temi Reservation Bill akhang

New Delhi, March 08 (Agencies): March 8, 2021 nü International Women's Day anogomong nung Lok Sabha Chairman-i onük balala süoka jembitsü atema tetsür MP tem nem maongka agüja liasü; ajioda Chhaya Verma, Priyanka Chaturvedi, Fauzia Khan nunger densema tetsür MP temi Lok Sabha aser State Legislative Assemblies nung tetsürtem nem menden shiteta yutsütsü atema takhangba agütsü.

Congress MP, Chhaya Verma-i, "Legislative Assemblies aser Parliament nung tetsürtem nem menden lemkütsütsü atema mapang tongogo. Sorkari 'Beti Padhao' indang jembir saka jalatem jenjang mejungi lir," ta ashi.

BJP nungi MP, Saroj

Pandey-i, tetsürtem bendanga züngshiba anentsütsü atema sorkari meranga inyaker, yamaji sorkari Triple Talaq agienogo aser tetsürtem ajungkettsütsü atema 'Beti Padhao, Beti Bachao' benoka inyaker, ta ashi.

Shiv Sena nungi MP, Priyanka Chaturvedi-i, Women Reservation Bill süoka jembiba sülen küm 24 jungogo, aser Rajya Sabha nung iba Bill agizükyonga atangji mebenoker, ta ashi.

Congress MP, Ami Yagnik-i, taoba mapang Ato kilonser, Rajiv Gandhi-i inyakba ajanga Panchayats nungbo tetsürtem nem menden lemkütsür, ta ashi.

BJP MP ana- Seema Dwivedi aser Sampatiya Uike nati tang sorkari tetsürtem nem

tashi agütsütsü atema mapa balala inyakba atema sorkar nem tenüngsang agütsü.

Rajya Sabha nunga okila tenzüka Chairman, M Venkaiah Naidu-i, "International Women's Day anogo ya alima nung tetsürtemi loktiliba, rongsenkettsüng, sobaliba aser yimtenren nung shilem tajung agiba atema tenüngsang agütsüba anogo lir," ta ashi.

Women's Reservation Bill - Constitution 108th Amendment Bill, 2008 ya tang tashi Parliament nung pangdaka lir. Rajya Sabha nung 2010 küm March 9 nü iba Bill agizüka liasü. Iba Bill benokra Lok Sabha aser state legislative assemblies ajak nung tetsürtem nem menden asemsü nungi ka lemkütsütsü (1/3).



New Delhi, March 08, 2021: Hombarnü International Women's Day anogomong nung Delhi arrtsülen Tikri Border nung Punjab aser Haryana na nungi aluyimer tetsürtemi Centre-i benokba aluyimba ozüng tasen asem anema longkak aitba noksa nung angur.

Tangbo Scindia BJP nung tesülen atsüngzüka yutsür: Rahul Gandhi

New Delhi, March 08 (Agencies): Hombarnü Congress lenir Rahul Gandhi-i, BJP lenir, Jyotiraditya Scindia-i Congress metoktsü asübo pa Madhya Pradesh nung Chief Minister kümer lila, ajisüaka pai party toktsüba yong tangbo pa BJP nung tesülen atsüngzüka yutsüogo, ta ashi.

New Delhi nung Congress Youth Wing züngsemtem den jembidang Rahul Gandhi-i, "Pai (Scindia) Congress metoktsü asübo pa Chief Minister kümer lila, saka tangbo pa BJP nung tesülen atsüngzüka yutsüogo," ta ashi.

Yaküm March ita nung Scindia-i Congress party toktsür BJP nung den-a liasü.

Taoba mapang Congress Tir, Rahul-i, "Scindia-i Congress nung inyakertem den külemi inyakba ajanga party tashi itshidaktsür lila. Ni pa dang, 'künübo na chief minister akümtsü', ta shir liasü, ajisüaka pai tanga lenmang ka dang shim," ta ashi.

Rahul Gandhi-isa, "Repranga dang ataang, yangjibo (BJP nungbo) pa (Scindia) kodanga chief minister makümtsü. Chief Minister akümtsü atema pa tanaben meyipa arutsüla," ta ashi.

Pai party youth wing nung inyakertem dang RSS aser BJP tangatetbatem anema raratsüla aser shinga metsübi inyaktsüla, ta ayongzüka liasü.

Scindia kibong ya akhidang nungi Congress aser BJP naprongla den tesendaktep lir. Jyotiraditya tetsü (otsüla), Vijaya Raje Scindia-i mezüng yimtenren nung ajemoka Congress nung aden aser Guna Lok Sabha menden nungi MP aküm. 1967 küm lai Congress toktsü aser Swatantra Party nung aden, iba sülen Bharatiya Jana Sangh (tamalen BJP) nung aden. Tesülen la BJP nung tatong Tir shima liasü. Jyotiraditya'er kinüngertem-Vasundhara Raje aser Yashodhara Raje nata tang BJP nung lenirtem lir.



March 08, 2021 nü Shimla nung International Women's Day anogomong sentong ka nung Himachal Pradesh nung tetsür police temi shilem agiba noksa nung angur.



Pope Francis-i otsü tase yanglua Iraq linük semdang meyipa apusotsü lia Baghdad nung tayimtsü nungi teka ayiploksüba mapang tangokba noksa ka yangi angur. Pai rara agi raksatsür aliba Iraq linük semdanga yangji Muslim aser Khristan lenirtem ajurua rara melen yimjung nung kati ka den meimtepa alitsü sayutsüngia liasü.

Myanmar nung longkak aiter ana khaset

Naypyitaw, Metsüremi/ March 08 (Agencies): Myanmar nung Hombarnü longkak aiter ana dak tekolak nung prangbong agi akaba sülen asü, aser linük nung mitkartemi yimsü asüba anema longkak aitba nung shilem ka ama Yangon yimti nung dokan, factory aser bank tema shibanga liasü.

Ozüng amshitsü atema mozüki aser university tem nunga security forces tem yoka liasü, ta state media ajanga ashi.

Linük north tsütsü Myitkyian jila nung longkak aiter dak injang ya shirnoki khaloktsüar ano mejangja saka yangji police aser mitkartem liasü, ta tenük kuli alirtemi ashi.

Facebook nung noksatem lemsatepba nung tebur ana yimtung nung laoa aliba nguogo. Mitkartemi sorkar atsüngdokba anema longkak aitba nung shilem agiba mapang stun grenades aser tear gas khaloktsü, ta parnoki ashi. Anasa aliba ki nungi injang khaloktsüba nunga nisung kar yirua liasü.

February 1 nü mitkartemi sorkar atsüngdokba anema anogoshi longkak aitba azüoktsü merangba mapang police aser mitkartemi nisung 50 dak tema tepsetogo, ta United Nations ajanga ashir.

Mitkartemi Aung San Suu Kyi'er sorkar atsüngdoka la den yimten yimsüsürtem pua mitkar sorkar amenokba sülen Myanmar nung rongrong adoka lir.

Suu Kyi'er National League for Democracy (NLS) teloki takok anguba November election nung ashikülak mapa inyakba ajanga iba mera ya agi, ta mitkar lenirtemi ashi, saka

electoral commission-ibo vote shidak agütsü, ta ashir. Parnoki ano election agishitsü nangzük saka anogo sangdonga mali. Kasa mapang security forces temi democracy busema longkak aitertem apur aser taoba hopta azüdokshiba ama mitkartemi yimsü asüba linük nung ataloka mali.

Hombarnü longkak aitertem Yangon, Mandalay aser danga jila tem nung adenshia liasü.

Linük south tsütsü tzükum nung aliba Dawei jila nung longkak aiter nem Karen National Union ajanga tanükba agütsü, shirnok mitkar den mapang talangka nungi rara arur.

Yangon kübok district aika nung amman aruba sülen prangbong aser stun grenade ola tem angashi, kong sepaitemi mozüki aser university compound nung camp amenoka liasü.

"Mitkartemi injang khaloktsü tenzük, Onok kimai maluteter, mapai moteter. Onok yangi kumzuka mali saka onok kimai maluteter," ta Yangon hospital anasa alir shishilembar kati osangbener dang ashi.

Mitkartemi mozüki mükabangba anema international Physicians for Human Rights (PHR) organization temi longkak aita liasü, koba international law nung aibelenba lir, ta parnoki ashir.

Yangon nung sepaitemi tapi agi nisungtem apur, injang khashishir aser züka merenshir, ta ashir.

Mitkari sorkar atsüngdokba tanaben meyipa agütsütsü aser Suu Kyi'er sorkar tanaben amenokshitsü takhangba

agüja construction, agriculture aser manufacturing densema union tekui Myanmar nübur ajunga dang mapa inyakba anentsü sangdong.

Shishilempaba aser rongsenketsüng mapa maneni inyakba ajanga mitkartem yaritsü, kechiaser parnoki Myanmar nübur tashi ajemreptsü, ta parnoki sangdong ka nung ashi.

"Democracy kumzuka mera agitsü tang mapang lir." Yangon nung süngo ayokba dokan tila dang kar lapoka liasü. Shopping center tem shebang aser factory nung mapa inyakba meliasü.

Police kabu nung lia NLD ketdangsür aser local campaign manager, Khin Maung Latt Deobarnü asü.

Longkak aitba nung ozüng agi melaba ama mera agir, ta mitkartemi ashir.

Deobarnü tashinung mitkartemi yimsüsüba kübok nisung 1,800 jungnüa süogo, ta Assistance Association for Political Prisoners advocacy teloki asadangteta lir.

Menden nungi atsüngdoker aliba committee ka asoshi inyaker nem temerenshi agütsütsü, ta sorkar meyong Gopal New Light of Myanmar osangkaket Hombarnü adok mezüng tapak nung shia liasü.

Iba committee ya ozüng alema tentetba lir aser ashikülak mapa inyaker, ta sangdong ajanga ashi.

Myanmar nung azüdokshiba ya anüolen linük aser democracy aliba Asia linüktemi aitsüogo.

United States aser anüolen linük kari mitkar lenirtem nem tenokdangba agütsü aser Australia-ia Myanmar den defence tsütsü tesendaktep sala.

Equatorial Guinea Military Camp ka nung bomb apok

Malabo, Metsüremi/March 8 (Agencies): Equatorial Guinea kübok military camp ka nung bomb pezü tashi apokba sülen nisung 20 süogo aser nisung noklang aika yiruogo.

TVGE channel-i sayaba footage nung economic capital Bata kübok kitem arongba aser Nkoa Ntoma camp temeket telungtet tuluka kongshir aliba den anüngleni mokozü tanak tuya aliba nguogo.

Kiojen raksar aliba nung tanur aser taintem agitetba nguogo. Iba den Bata nung mozüki nung yirur alirtem temang anepalutsü atema atatepa atem nung mepidaker aliba nguogo.

Health ministry-i ashiba agi, camp temeket nung aliba nüburtem aika kiojen raksar aliba nung rema alitsü akok.

Tir Teodoro Obiang Nguema-i ashiba agi, local aluyimertem kari iba tesem nung mi mazüokteti jangrua yokba ajanga explosives tem pokdaksü, koba sepaitemi military camp nung junga merizüngi yua liasü.

"Nkoa Ntoma military camp nung explosives, dynamite aser

ammunition rizünga ayuba unit in charge-i mapa shidak minyakba ajanga Bata yimti nung alirtem dak kongshiogo," ta Obiang Nguema-i ashi.

"Aluyimertemi alu nung mo arongba ajanga mi jangroloka item depots tem pokyonga ao," ta paisa ashi.

Defence ministry-i ashiba agi, iba lendong nung nisung 20 süogo aser nisung 600 shi yiruogo.

Explosives tesashi nung mi jangroloka apokba ajanga ki aika ajasatsüogo, ta ministry-i shisem.

Kasa mapang nung Obiang Nguema-i alima linük balala dang teyari meshiogo.

"Petrol jenjang mejungi akümba aser Covid-19 wara ajanga rongsenketsüng nung timtem adoker aliba ajanga Equatorial Guinea tang jenjang tamajung ka nung aliba mapang iba lendong atalokogo," ta pai ashi.

Bata ya Equatorial Guinea nung yimti tulutiba lir aser linük nütsüngyongsük million 1.4 nungi 800,000 shi iba yimti nung alir aser parnok timba sensak tia nung lir.



Damascus, Metsüremi/March 8: Syria Tir Bashar al-Assad aser pa kinungtsü Asma na dak COVID-19 putet, ta sangdong ka ajanga ashi. Syria nung frontline health workers nem Coronavirus mozü agütsü tenzük hopta ka dak tema lir iba osang ya angashir, kong sorkar kübok aliba tesem nung nisung 15,981 dak COVID-19 positive putet aser kasa tashidak yagi nisung 1,063 süogo. Linük northeast tsütsü Kurdish nunger kübok aliba tesemtem nunga nisung 8,689 dak iba virus ya puteta lir aser nisung 368 süogo.

Israel-i Palestine nunger nem vaccine agütsü tenzükogo

Jerusalem, Metsüremi/ March 8 (Agencies): West Bank nung Israel-i atsünger aliba tesem aser Israel nung mapa inyaksü atema temelaba bener aliba Palestinian nunger 100,000 nem vaccine agütsütsü atema Israel-i Hombarnü sentong ka tenzükogo.

West Bank nung alir Palestine nunger 700 nem vaccine agütsütsü asoshi pilot programme ka Brehostibarnü tenzükogo.

Palestine nunger litsü nung civil affairs achaayangba Israeli military branch COGAT-i ashiba agi, Palestine nunger 100,000 shi densema aliba sentong tongtiba iba hopta tenzüksü.

Israel indang emergency medical service, Magen David Adom-i sangdong ka ajanga, parnoki Hombarnü nungi West Bank aser Israel na sendaktepba checkpoints teshimtet kar nung Moderna vaccine agütsü tenzükogo ta ashi.

Kasa mapang nung West

Bank nung Israel-i atsünger aliba industrial tesemtem kübok centre tem nung vaccine agütsü tenzükogo.

West Bank settlements nung Yihuda nunger 475,000 shi alir, shirnok ozüng alema alirtem ta alima kin aikati züngshir.

Palestine nunger meyirejang aika iba tesem nung mapa inyaker.

Jerusalem anüdoklen aliba Palestine nungertema December ita Israel nungertem atema amenokba sentong nung züngokemogo.

Israel-i, tang tashi nung linük nung nütsüngyongsük million teku nungi shilem 40 shi nem Pfizer aser BioNTech vaccine agütsüogo.

Israel-isa, Deobarnü vaccine agia "green pass" bena alirtem nem restaurant, bar aser café tem lapoktsü atema temelaba agütsüogo.

Ajisüaka Israel-i atsünger aliba West Bank nung tashidak prokshia aoba azüoktsü atema tenokdangba tali agütsüogo.

MykiFest Award, 2020-21 sentong agiogo



Kohima, Metsüremi/ March 08, 2021 (TYO): International Women's Day anogomung den liromedema, Hombarnü (08.03.2021) Hotel Japfü, Kohima nung Women Resource Development, Nagaland-i MykiFest Award, 2020-21 sentong ayonga agiogo.

Iba sentong nung Commissioner & Secretary, Anenla T. Sato, IAS-i, MykiFest sentong ya 2018-19 küm tenzük aser State indang rongsenkettsüng renloka aoba nung tetsürtemi shilem tajung agiba bilemteta küm nung khen iba sentong agir. Naga tsür temi maparen balala nung shilem tajung agia, takok anguba den lenla aisü nung renloka arudar, ajisüaka nübürtemi ibaji mangashi mesüra memetet ama toktsür, ta ashi.

Ibayongji, tetsütem l o n g j e m t s ü , shishilembatsü, parnok tsüngda tasa/asalentong lemsateptsü, parnok sempet sayutsü mesüra parnoki inyaktetba ayoktsü atema MykiFest sentong tenzüksütsü asoshi tasa angu, ta lai ashi.

Lokti ka ajungkettsütsü

asoshi tetsürtemi meranga inyaksüla aser tetsür kati shisakaa renema aliba jagi maparen aika nung nungitter aser takok ngüdaksür. Anungji, State nung tetsürtem ajungkettsüba maparen tsütsü bendanga agüja inyaker NGOs aser tanga tetsür telok balala indang inyakyimtem jangjashitsü aser tali temulung a g ü t s ü d a k t s ü t s ü nükjidong nung MykiFest Awards sentong tenzüksü, ta Sato-isa ashi.

Advisor, Veterinary & Animal Husbandry & Women Resource Development (WRD) Department, R. Khing-i, tetsürtemi tongti shilem agiba ajanga tawa tanü lokti nung temelenshi tajung aika adokdaksüogo, ta ashi. Tebur dang nungibo tetsütem kanga agi temerangba inyaker aser State tejakleni bener aotsüsa parnok (tetsür) meranga inyakba aniteter, ta Khing-i ashi.

Yimtenren wadang nunga ano tetsürtemi shilem agidaksüner ta pai ashi aser iba maparen nung dena shilem tajung agitsü asoshi pai tetsürtem ajungshiogo. Naga nunger

atema lennir tajung ka ka akümtsü aser tarutsü tajungba asoshi lanurtem tim lenmang nung anitetsü asoshi paisa tetsürtem ayongzük.

Maneni, MykiFest award sentong ya shilem ana lemsar agia liasü.

Group category nung Runway Nagaland, Dimapur, North East Network, Nagaland, Apparels & Accessories Production Team, TLI Project, Department of Women Resource Development tem nem award agütsü

Individual category nung, Kohima nungi entrepreneur Vimenuo Belho, Thahekhu, Dimapur nung Listone Pebble Art ngutetla, artist Iboli Zhimo, Khuzama Village nungi Vikengunu Kera Fatima, Khonoma Village nungi rural entrepreneur, Mezüheno aser Khamniung kin nungi painter Phaoniu Shio nungeri award nguogo.

Iba sentong tembanga Addl. Director & HoD, WRD, Vilone Sakhrie-i tepela anküp o jembia aser paisa, küm pezü sülen MykiFest award sentong agitsü, ta ashi.

Mulungnen O

"Atangji tajung aser taochi kü arishi tepiyong kü sülen anitaksü; aser ni kibuba kidang teti alitsü."

- Tenüngsang Ken 23:6

Asür T. Alemla, Japu, (Col. Aomeri tebuttsü) La March 3, 2021 anogo Mokokchung nung alima nungi pilaa ao. La shirangba mapang nungi asüba anogo tashi nung Arogopur, medical staff, lokti balala, kiyong kidanger, yimtsüyimer, medemertem aser kija kibong balala shirnokisa nebu, rongsen aser shisatsü agi nongita yariogo nenok ajak dang kangasa pelar. Onoki nenok tsüngdong arua pelaba meshitetaka Tsüngremi nenok ajak tali moajangma.



- Temeim Kinungbo, Chirnurtem, Semchirtem, Anükabang aser Kinungertem.

METETDAKTSÜR

Ao Senso Telongjem Guwahati (ASTG) aser Ao Students Union Guwahati (ASUG) indang taoba mapang züngsemtem dang 2021 November ita ASTG & ASUG Platinum Jubilee amungtsü ta metetdaksür. Iba Jubilee benjungmung dak sendakba nung, ASTG-i Kohima District telungtet nung alir taoba züngsemtem den Kohima nung telongjem sentong ka aginur. Anungji, taoba mapang züngsem ajaki March 31, 2021 nü tashi nung tsünglanglen agüja aliba contact no. mashi ka ajanga parnok tebilembatem tongtsütsü asoshi mepishir.

- LimawapangLongkumer +91-9612164954.
- TongpokPongener +91-9862089869.
- Alemwapang Imsong +91-9436799999.
- Chubasunep Jamir +91-8132918737.
- BurakumAo +91-9863174444.

LIMAWAPANG LKR
Convenor
Committee for Kohima District

BURAKUM AO
(Secretary)
Committee for Kohima District.

Mokokchung nung 'Janaushadhi' mungogo



Dimapur, Metsüremi/March 08, 2021 (TYO): Mokokchung nung March 01 nungi March 07, 2021 tashi "Seva bhi, Rozgar bhi" omen nung ajemdaker 'Janaushadhi Week' sentong ayonga agiogo, ta CMO sangdong ka ajanga metetdaksü.

Jan Aushadhi dak sendakba nung nübürtem tsüngda tekümdangtsü sangoktsütsü mechi, March 01, 2021 nü NCD Clinic, IMDH nung free health check up camp ka ayongzük, kong blood pressure, sugar level tendangba den Doctor Consultation dena liasü.

March 03, 2021 Chief Medical Officer, Mokokchung, Dr.R. Chubala Aier-i anir team kati Sabangya nung Orphanage Home semdanga liasü. Iba Orphanage ya Care and Support Society, Mokokchung ajanga achaayanger. Team-i orphanage nung alir tanurtem aser parnok anepalurtem (caretaker) den sensaksem aser temang anema alitsü den merük mejua alitsü indang tesayuba agütsü.

Iba orphanage nung alirtem dang team-i Janaushadhi indang

tajangzüktem metetdaksü aser tanurtem nem temang nung teyari agütsüba chiyongtsütem agüja liasü.

March 05, 2021 nü Dr. Kilangwabang Pongener, MD(Medicine), Sr.Specialist, IMDH, Mokokchung-i anir team kati Old Age Recreation Centre, Dilong Ward, Mokokchung semdangogo. Iba mapang, team-i pensioner aser tantsü-tambu tem den sensaksema liasü. Dr. Kilangwabang Pongener-i parnok dang temang timi anepaluba, merük mejua alitsü aser temang nung teyari agütsüba chiyongtsütem achiba indang tongtibangtem metetdaksü. Iba den külemi, shilem agirtem dang COVID-19 vaccination indang metetdakja liasü. Kasa mapang, team-i shilem agir ajak nem angati mozü balala lema agütsü.

Maneni, Jan Aushadhi sentong Mongolbarnü (07. 03. 2021) tembang, kong Ato Kilonser, Shri. Narendra Modi-i NEIGRIHMS, Shillong nung 7500buba Janaushadhi Kendra lapoktsü, ta kasa sangdong ajanga metetdaksü



Dimapur, Metsüremi/March 07, 2021: Naga Delicacy, Dibrugarh nung February 27, 2021 nü Naga Students' Union Dibrugarh (NSUD)-i freshers day mungogo, kong Er. Tali Longchar o jembir ama jaok. Taküm, Naga Students' Union Dibrugarh-i züngsem 20 shi agizükogo. Iba sentong temer sülen telok külemi tangokba noksa ka yangi angur.

Nallong FC-i 15buba Jalukie Valley Open Football Trophy kokogo



Nallong FC den DC Peren Sentiwapang Aier aser tanga ketdangsertem tangokba noksa nung angur.

Dimapur, Metsüremi/March 8 (TYO): 15buba Jalukie Valley Open Football Tournament final asaya nung Nallong (White) FC-i goal ka agi Jalukie B Youth (A) kokogo. Final asaya Jalukie 'B' local ground nung asayaa liasü.

Hombar nikonksütsü final asaya nung Nallong FC-i tetenzük nungi asaya amokbanger asaya aser kasa mapang nung Jalukie B-i counter attacks dak metalok asaya, saka takok mongutet.

Asaya mezüngbuba shilem nung team kati danga goal magütsüteti asaya.

Asaya tanabuba shilem nung Nallong FC-i tajungba asaya tenzük aser minute 57buba nung Kakhevi Assumi-i Nallong FC atema goal ka idaktsü. Defence nung aibelenba sülen pai iba goal idakja liasü.

Nallong FC striker Shamba Samson T Konyak-i ano goal ka idaktsüteter lila saka pai

metsüba ball crossbar nung odak.

Asaya akokba sülen Nallong FC team coach Chamchangbo-i, asaya kanga toktepba asayaogo ta ashiba den takok asoshi Tsüngrem nem tenüngsang agütsü.

Paisa, taoba asayamung ana nung semifinal nung Wihiambo FC Jalukie-i parnok tsükdaktsüba sülen taküm iba asayamung mezüngbuba koktetba atema kanga pelaba lemsatet. Paisa, taruba kümtem nunga iba asayamung akoktsü imlaa ataba lemsateta liasü.

Final asaya nung DC Peren Sentiwapang Aier alakteta jaoker liasü. O tatsüka jembiba mapang pai asayartem dang asayaba moapu nung yimyayimpong tajung sayua asaya reprangrtem dang chichiba asayar yimya sayutsü ajungshi.

Paisa, iba amala sabang ajanga maongka agi asayartemi

parnok career yanglutsüla ta ashiba den asayartem mapang ka nungbo asaya nungi anentsüsa akümtsü, ta ashi. DC-isa asayartem dang parnok sasep nung saisapong ajungkettsü atema inyaktsü ayongzük. Asaya tatemi pai takokertem nem sempet agüja liasü.

Champions Nullong FC nem senpet sen lakh 1 den takok marok aser runner's up Jalukie B Youth (A) nem senpet sen 50,000 agütsü.

Maneni jurila sempettem rongnung Nallong FC nungi Neithovilie Chalieu nem best goal keeper of the tournament naroküm den senpet sen 3000 agütsü aser Jalukie B Youth (A) nungi asayar Sujimong LKR nem best player of the tournament den senpet sen 5000 agütsü.

Iba asayamung ya Jalukie Valley Youth Organization-i ayongzüka asaya, kong team 26-i shilem agiogo.

Stephen Curry-i NBA All-Star 3-point Contest kokogo

Metsüremi/March 8, 2021 (Agencies): Deobarnü Atlanta, Georgia nung NBA All-Star Game tenzükba sentong nung Golden State Warriors nungi asayar Stephen Curry-i 3-point contest kokogo. Final round nung pai Utah nungi asayar Mike Conley koka liasü.

Curry ya NBA nung shooter tajungtiba rongnung ka lir, pai iba toktepba akoktsü imlaa liasü, kong asayartem three-point arc temeket nung tesem balala nungi shoot asür aser ano süklep ka ana tesüleni lur point talila atema ball ona liasü.

Curry-i mezüngbuba round nung point 31 angur aser Conley aser Boston nungi asayar Jayson Tatum den tejakdangi atu.

Ajisüaka final round nung asayar ana tsüngda kanga

toktepa asaya. Curry-i mezüngbuba shot asem midaktsütet saka pai tatembangbuba shot nung tachichilen kinük nungi ball idaktsüteta point 28 angur, koba Conley-i 27 ngur aliba dang nungi ka agi timba liasü.

"Ni ball idaktsütsüla ta meteta liasü. Kanga jangradema toktepogo aser akokba atema pelar," ta Curry-i ashi.

Asaya mapang 3 pointer kanga junga yoktetaka Curry-i 2015 küm dang iba toktepba khen koka lir.

Iba toktepba ya yimya agi All-Star weekend nung Honibarnü aonung asayar, ajisüaka coronavirus wara pokteter aliba ajanga All-Star inyakyimtem ajemshija anogo ka dang amung kong three-point contest aser Skill Challenge

dang asayaa liasü.

Kasa mapang nung Indiana Pacers forward Domantas Sabonis-i Skills Challenge kokogo. Pai final round nung Orlando Magic nungi asayar Nikola Vucevickoka liasü. Iba toktepba nung dribbling, passing aser tanga shooting skills aika tendanger.

Iba asaya nung New York Knicks nungi asayar Julius Randle aser Dallas Mavericks nungi asayar Luka Doncic natia final tongteta liasü.

Iba takok ya Sabonis atema kanga jangrademtsüka liasü, shibai 2020 küm final nung Miami nungi asayar Bam Adebayo makok.

"Jangradema asayaogo. Takümbo kechi südir süaka akoktsü bilema liasü," ta Sabonis-i takok marok agizükba mapang ashi.

World Ranking Series nung Bajrang Punia-i Gold angu

Metsüremi/March 8, 2021 (Agencies): Nüngtugu wrestler Bajrang Punia-i Deobarnü Matteo Pallicone ranking series nung gold nguogo. 65kg freestyle event final nung pai Mongolia nung Tulga Tumur Ochir 2-2 agi criteria nung akok aser pa maneni temaba jenjangi tuogo.

Final asaya tembangtsü mapang tashi nung Bajrang 0-2 agi tesülen liasü saka wistel aputsü second 30 lia pai point ana nguteta score kasasa aküm.

Tatembangbuba point India nung asayar yagi angu asünung criteria ajanga pa nem takok agütsü.

Covid wara pokteta ajanga küm ka tepeyong masayai arur international jenjang nung asaya tenzükba sülen arishi küm 27 tain Punia-i final asaya nung kanga

atasaa asaya aser kanga junga defend süa asaya tatemi second 30 tsüngda point ana ngua asaya akok.

Taoba küma Punia-i iba asayamung final nung USA nung asayar Jordan Oliver koka liasü.

Covid wara pokteta ajanga asaya ajak bangdaka atar saisapong tenzükba sülen Punia-i, USA nung invitational event ka aser exhibition match ka nung shilem agiogo.

Haryana nung wrestler yagi semi-final asaya nung USA nung Joseph Christopher 6-3 agi akok aser quarterfinal nung pai Turkey nung asayar Selim Kozaan 7-0 agi koka liasü.

Deobarnüsa Rohit-i bronze medal asaya nung Turkey nung asayar Hamza Alaca 10-12 agi makok.

Japan nung timbakati Tokyo Olympics mapang bendanger marudaktsüner

Metsüremi/March 8, 2021 (Agencies): Asayamung ayongertem bendanger fan tem dak sendakba nung telemtetba ka agitsü atema renemshiba mapang Japan nung shilem 75-i Tokyo Olympics mapang bendanger marudaktsünüba Hombarnü poll ka ajanga sayuogo.

Yomiuri Shimbun daily poll ka ajanga poll nung shilem agir shilem 18-i bendangertem arua asayamung reprangdaktsüner, saka shilem 77-i bendangertem marudaktsüner. Asayamung ayongertemi taoba hopta ashiba agi, march 25 nü linük ajunga nung torch relay metenzük tsüngda parnoki iba ita telemtetba ka agitsü.

Ajisüaka Japanes media-i ashiba agi, asayamung tekolaktemi bendangertem

marudaktsütsü telemtetba agiatokogo.

Tokyo 2020 tir Seiko Hashimoto-i Hokolbarnü ashiba agi, asayamung ayongertemi alima ajunga nung fan tem stadium süng adenshir asayamung asayaner, saka medical facilities kanga tajung aser parnok agizüktsüsa jenjang ka nung melira parnok magizüktsütsü.

Yomiuri poll ajangsa poll nung shilem agir shilem 45-i asayamung reprangtsü atema nüburtem arudaktsüner aser shilem 48-i marudaktsünüba sayuogo.

Asayamung ayongertemi iba dak sendakba nung April ita telemtetba agitsü.

Iba poll ya March 5 nungi 7 tsüngda nisung mashi ka dangi phone calls süa agi aser nisung

ICC Women World Cup nung team timba sayadaktsütsü

Metsüremi, March 8, 2021 (Agencies): Tetsür cricket asayartem atema ICC asayamungtem nung 2026 küm nungi team timba küm daktsütsü, ta asaya achaayangba lokti tenteti Hombarnü international women's day amungba mapang parnok sentong sangdongogo.

ICC-i ashiba agi, 2026 küm nungi T20 World Cup nung team 10 melena team 12 asayadaktsütsü. ODI World Cup nunga 2029 küm nungi team ti aliba 10 küm tsütsü, ta ashi.

2024 T20 WC nungbo team 10 dang asayatsü aser taruba ODI World Cups ana nung tang asaya aliba ama team ti dang asayadaktsütsü.

"Taoba küm pezü tsüngda onoki fan tem nem shilem agidaktsütsü atema tetsür asaya global broadcast coverage aser marketing atema inyaka aruogo," ta ICC Chief Executive Manu Sawhney-i ashi.

"Result ajanga dang sayur asünung ICC Women's T20 World Cup 2020 nungbo video views billion 1.1 liasü," ta pai ashi.

MCG nung final asaya reprangtsü atema nisung 86,174 aru, koba women's cricket asaya ka nisung timtibai reprangba liasü.

Women's T20 Champions Cup-a 2027 küm nungi tenzüka team trok asayatsü.

BILEMDANGANG

"Taküm bendanga agütsüba dak alia tanga tenla tuluba kechi ali."